

Protocol no. 2**Sezzüda da marcurdi, 18 schner 2012 – 20.00 – 23.40**

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Claudia Luppi (protocol)

Protocol

Il protocol no. 1 da la sezzüda da mardi, 10 schner 2012 vain approvà.

10 012 EXECUTIVA
Eleczion dal giurist da cumün

Ils ultims ons vaiva il cumün da Sent duos giurists per la cussagliaziun guridica, a sar Duri Pally per dumondas da fabrica e planisaziun ed a sar Peter Andri Vital per ulteriuras dumondas giuridicas. Il capo propuona da simplifichar la chosa cun avair be amo ün giurist per tuot las dumondas giuridicas dal cumün. Illa discussiun as muossa cha'l Cussagl cumünal metta grond pais sün üna collavuraziun sün basa neutrala cul giurist e cha quella saja da gronda portada impustüt i'l sector da fabrica e da planisaziun. Per avair la garanzia d'üna collavuraziun sainza difficultats ed eir per simplifichar l'andamaint cun avair be amo ün cusgliader giuridic e quai da nossa regiun e da lingua rumantscha, decida il Cussagl cumünal da tscherner be amo a sar Peter Andri Vital sco giurist da cumün.

11 86 PROVEDIMAINTE ELECTRIC
Reparatura provisorica lingia electrica Sur En – Panas-ch Sura

Causa las naiveras dal cumanzamaint da schner es la lingia electrica tanter sur En e la chava da Panas-ch Sura gnüda donnagiada fermamaing. Per pudair accumplir ils dovairs dal cumün da Sent invers la firma Uina SA tenor il contrat, ha la lingia stuvü gnir reparada provisoricamaing. Ils cuosts per la reparatura provisorica s'amuntan sün raduond fr. 30'000.--. Il schef d'energia orientescha ch'el haja tut sü contact culla sgüranza per eruir scha'l don gniss eventualmaing surtut da la sgüranza. Implü orientescha il schef d'energia eir chi saja previs sco soluziun definitiva da metter quista lingia suot terra e cha quel proget gnarà preschantà a temp ütil al Cussagl cumünal ed a la radunanza. Il Cussagl cumünal decida da concerder il credit da fr. 30'000.-- per la reparatura provisorica.

12 012 EXECUTIVA
Reponderaziun a regard eleczion

Causa ch'id es success ün sbagl pro l'eleczion da la cumischiun da planisaziun vain fat ün müdamaint. La cumischiun as cumpuona uossa seguaintamaing:

Cumischiun da planisaziun: Dumeng Jann (president), Walter Casura, Urs Domenig,
Andri Poo e Cristina Gregori Linsel

13 810

ADMINISTRAZIUN FORESTALA

Dumonda dal silvicultur a regard üna reducziun dal pensum da lavur

Causa cha'l silvicultur vain confruntà repetidamaing cun criticas a regard seis ingaschamaint sperapro pro la Seilpark Engadin GmbH, ha'l inoltrà la dumonda da pudair redüer il pensum da lavur pro'l cumün per raduond 10%. Il capo til vaiva giavüschà d'inoltrar quista dumonda eir in scrit. Il schef da god ha discussiunà la chosa cul silvicultur ed ha muossà sü ch'üna reducziun dal pensum per var 10% nu maness l'effet giavüschà. Implü ha il schef da god muossà l'uorden da persunal chantunal, tenor il qual l'ingaschamaint sperapro dal silvicultur füss cumpatibel cun sia piazza da lavur pro'l cumün. In seguit ha il silvicultur decis da retrar per intant la dumonda da redüer il pensum.

14 942.423.07

Chamonnas cumünalas

Chamonas cumünalas 2012

Il schef da god e pauraria preschainta las annunzchas inoltradas per las chamonnas cumünalas pel 2012 ed il Cussagl cumünal decida, in assenza da l'actuara sco interessenta per üna chamonna, da surdar quellas seguaintamaing:

- | | |
|-----------------|---|
| - S-chalambert | Georg Buchli |
| - La Latta | Plasch Demonti, Rupert Demonti |
| - La Chavrida | 1. grupp: Lorenz, Armon, Claudio, Otto, Marco e Prisca Scandella |
| | 2. grupp: Armon Taverna, Men, Christian e Conrad Benderer Remo Jäger, |
| - Uina Dadora | Flurin Nuotclà, Andrea Hauser e Mario Tschalär |
| - Chöglias | Otto, Nicolo e Flurin Roner |
| - Chavriz Grond | Jon Domenic Vital, Ernest Vital, Daniel Vital, Silvio Vital, Johann Otto Taverna ed Andri Taverna |
| - Charanella | Andri Fried, Christian Felix ed Arno Felix |
| - Patschai | Jon Andri Schmidt |
| - Muschna | Men e Claudia Luppi |
| - Darsüra | Not ed Anna Barbla Buchli |
| - Taslaina | Jachen e Tina Puorger |

La famiglia Overat vaiva eir deposità il giavüsch da tour a fit üna chamonna cumünala, chi nu gniss douvrada d'ürant il temp da chatscha causa ch'els tilla ütilisessan jent impustüt la prümavaira e l'utuon. In vista chi sun entradas per tuot las chamonnas cumünalas dumondas concretas e cha be lur dumonda nun as referiva sün üna chamonna concreta, decida il Cussagl cumünal, da giavüschar a la famiglia Overat d'inoltrar ün oter on concretamaing per che chamonna ch'els as interessessan.

15 021

FABRICA

Swissroof GmbH– cas pendent davant güdisch

Il schef da fabrica orientescha cha la Swissroof GmbH tira il plont cunter il cumün inavant davant güdisch federal a Lausanne. Causa cha'l giurist sar dr. iur. Duri Pally s'ha occupà da prüma davent cul cas ed ha eir fat buna lavur, decida il Cussagl cumünal da laschar il mandat pel cas pro el, eir scha'l Cussagl cumünal ha decis d'incumbenar in avegnir a dr. iur. Peter Andri Vital cullas dumondas giuridicas da fabrica.

Cuors a la HTW Cuoira

Il capo orientescha ch'el saja intensiunà da frequentar ils seguaints duos cuors a la HTW: *“Wirksame Behördentätigkeit”* e *“Grundlagen der Personalführung in Gemeinden”*.

Pel pajamaint dad ün dals cuors po il capo schlubgiar il bun ch'el vaiva survgni da la HTW in occasiun da sia tscherna sco capo.

Lavurs da mantegnimaint da la senda dal Quar

Sco manzunà fingià illa tractanda 1059 dal protocol dals 31 october 2011 es üna part da la senda aint il Quar permanent periclitada tras movimaint da material uschè chi sarà da calcular cun gronds cuosts per pudair sgürar il traiget aint illas Gallarias. Causa cha'l Quar es üna part dal traiget nord-süd chi maina dad Ischgl in Austria sur la chamonna da Heidelberg e la chamonna Sesvenna fin giò la Val Vnuost in Italia, vaiva il schef da turissem giavüschà dal 2011 cha la PEB sclerischa scha'l proget pudess gnir valütà sco proget da l'Intereg. La schefa da turissem chi ha surtut quist affar da seis antecessur orientescha ch'ella saja statta in quist connex ad üna sezzüda, organisada tanter oter da la PEB, illa Val Vnuost. A regard la valütaziun da la sanaziun da la senda dal Quar sco proget da l'Intereg esa da preverer il seguaint proceder: Il prüm stuveess esser avantman ün proget concret cun cuosts approximativs. Lura as pudess inoltrar il proget sco proget d'Intereg culla premissa cha davart il cumün svizzer pertoc gniss garanti ün tschert import sco partecipaziun vi dals cuosts. L'elavuraziun d'ün proget po gnir tutta per mans il plü bod prümavaira chi vain. La schefa da turissem orientarà regularmaing sur dal stadi da la fatschenda.

“Alpiner Schutzwaldpreis”

Il schef da god orientescha cha nossa gruppa forestala saja nominada cul proget da las eivnas da god 2008/2009/2011 pel premi “Alpiner Schutzwaldpreis” illa categoria “lavor publica” e ch'el sco schef da god possa ir insembel cul silvicultur a Schaan (FL) a la tscherna dals vendschaders dal premi. Per quist premi sun nominats progets da Bayern, dal Tirol, Vorarlberg, Kärnten, Osttirol, dal Tirol dal Süd e da l'Engiadina.

Actualisaziun dals plans da cataster

Il schef da planisaziun orientescha ch'el haja contactà il büro respunsabel pels plans da cataster cul giavüsch da vulair actualisar prosmamaing amo ils plans da cataster pendants per chi possa gnir lavorà cun plans da cataster actuals in vista a la revisiun totala da planisaziun cumünala.

Plans da cataster per dumondas da fabrica

Il schef da fabrica fa la proposta da na far inoltrar pro mincha fabrica plans da cataster novs, dimpersè d'acceptar eir plans da cataster chi sun pro'l patrun da fabrica fingià avantman e chi nu sun plü vegls co desch ons.

Planisaziun cumünala

Il schef da planisaziun orientescha sur da divers temas chi pertoccan la revisiun totala da la planisaziun cumünala, pel mumaint sistada a regard la preexaminaziun fin cha'l nouv Cussagl cumünal ha gnü invista illa fatschenda. El spiega ch'el prevezza da repassar la materia in möd efficiant tenor temas da priorità per cha'l proceder da preexaminaziun possa gnir dat liber uschè svelt pussibel.

Trafic

Il schef da trafic orientescha sur da diversas pendenzas il decasteri da trafic. Ils temas gnaran tuts per mans tenor priorità ed urgenza.

L'actura: